



大甲河

鮮鮮大甲河，對白雲个故鄉，該高高个中央山脈嶺頂，一路交朋結友，匯集山坑壠溝水，礮礮春春闖對烏水溝去。行到東勢之時，既經變做會打走人个大河壩了！河壩水係兩岸馴良百姓个重要資糧，對早期个拈大水樵起勢，到起屋愛用著个沙沙石石、灌溉作穡、民生用水……，無一樣毋係對厥身上來取得。佢，斯像奶水足足个阿姆共款，任在圖豺个細人吮無停，也因為恁泥，對戴在兩片向个居民來講，大甲河斯係厥這兜个母親河，該心心念念个感情，毋係外地人揣得著个。

打早，日頭對東片山嶺頂探出頭，金哲哲个絲線千條、萬條，連到大甲河个水面來，閃光个水面跔核開出一條黃金大路，鋪平在眼前，錫到人腳撓撓，發夢乜會想去該黃金路面躡躡啊哩。不管時都恁清淨个河壩水，歸夜無人攪杈，佢，恬恬靜靜溜過石頭、砂面，輕手輕腳流往下，路途中堵著礫礫砵砵大石牯，呻一聲，轉一個幹，又拚緊流往下。直直到烈烈个日頭來撩弄，尋食个魚、园石頭下个蝦公老蟹來造磨，歸條河壩正開始活生疏來。

河壩水日日夜夜潑啊潑，岔出來个細河溪，係吾這兜細漢時節搞寮个好所在。褲腳攝高高，大家手綁縷，驚驚險險躡入河壩肚，斟酌看，慢屣步。浸到腳囊肚个河壩水清清又涼涼，出手出腳搥人跔佢行，毋堵好一陣人斯分佢搥去翹翹橫，一橫斯一身潦潦。佢，流過身邊嘩啦嘩啦緊笑緊大聲。

石跳係大甲河个手牌，紮莖草愛躡過石跳，躡一到過一粒。蹴溜撇，斯直接頓落河壩肚。一頭一面个河壩水，對頸根涼到腳指甲，清淨个水，洗撇心肝肚礫礫砵砵个想法，早前有麼个慍悴事，也分佢冲淨淨了。無著鞋个童年，省撇脫鞋著襪个費氣。搭潦个衫褲貼緊圍身，歸去斯伏在溫燒个大石牯面項，晒死蜈蚣樣任在日頭晒屎肚。恁泥一晒斯撇三四十年个歲月，河壩水還係在耳公脣嘩啦嘩啦笑無停；悠悠个白雲還係在藍藍个天頂遊寮，他鄉个遊子像紙鷂，夢中个母親河揪核心肝肚个該條線，久久毋放……

作者：劉玉蕉

☆詞彙學習☆

- | | |
|---|--|
| 【烏水溝】vu+ shui ^ˊ gieu ⁺ ：臺灣海峽。 | 【攪杈】giau ^ˊ ca ^ˊ ：打擾。 |
| 【圖豺】tu ^ˊ sai ⁺ ：貪吃而不知節制。 | 【造磨】co ^ˊ mo ^ˊ ：形容惹事。 |
| 【金哲哲】gim+ si ^ˊ si ^ˊ ：亮光閃爍。 | 【出手出腳】chud ^ˊ shiu ^ˊ chud ^ˊ giog ^ˊ ：手腳並用。 |
| 【開出】hia ^ˊ chud ^ˊ ：揮灑出。 | 【圍身】vui ^ˊ shin ⁺ ：身體。 |
| 【腳撓撓】giog ^ˊ niu ⁺ niu ⁺ ：腳癢癢。 | 【歸去】gui ⁺ ki ^ˊ ：乾脆。 |
| 【不管時】bud ^ˊ guan ^ˊ shi ^ˊ ：任何時刻。 | |

☆文法學習☆

【對……】dui^ˊ：從……。此處用於時間或空間的起始點，常會與「…到…」形成一個完整的句型。

例 1：佢緊拚拚走對屋背去，毋知有麼个事！（他急急忙忙的跑到屋後，不知有甚麼事！）

例 2：對這位到臺北愛點外鐘久。（從這裡到臺北要一個多鐘頭）